

VIA-SAKRA NO EKOLOJIA

H: Na'i, iha tempu ida ne'e sai forte liu ami-nia konfuzaun no ta'uk. Transformasaun kontinua ne'ebé mosu, krize boot ne'ebé ami sei liu daudaun, funu ne'ebé ameasa mundu tomak, halo ami-nia moris loron-loron nian no sasin fiar nian sai susar. Nu'udar dixipulu sira, ami hakarak hala'o Ita-nia Oan ne'ebé halo An ba mane nia paixaun, no aprende atu rekoñese paixaun ida ne'e iha ema sira nia paixaun, iha via sakra sira ne'ebé tau iha Kriasaun, ne'ebé Ita hadomi liu fali ami.

Tulun ami atu tuir Jezús ne'ebé hakarak hola ami isin hodi fahe buat hotu ho ami, maibé la'ós sala sira.

G: Aman laran sadi'a nian, durante Via Sakra ida ne'e, haroman ami ho Ita-nia Liafuan no Ita-nia Oan nia ezemplu. Hodi rekoñese Ita nia tau matan domin nian ba ami, sei buras iha ami hakaran atu tau matan ba maun-alin feton sira ne'ebé la'o hamutuk ho ami no tau matan ba "uma komun" ne'ebé haraik mai ami. Ami harohan ne'e hodi Na'i....

H: Amen

I: JEZÚS NIA AGONIA

Iha Getzemani, Jezús sofre tan ema hotu husik Nia; ita hanoin ba agonía Rai nian tan ema nia indiferénsia hasoru buat aat ne'ebé halo ba nia.

Mk 14,32-34.37-38

L2: Amo Papa Francisco iha *Laudato Si'* (n. 2) hakerek: "Biin ida-ne'e halerik hasouru buat aat ne'ebé ita halo ba nia tanba ita uza la loos no abuza hosi buat-karan ne'ebé Maromak tau iha nia. Ita buras hodi hanoin katak ita mak rai-na'in ne'e-duni ita bele ukun arbiru no iha autorizasaun atu hadau na'ok buat hotu ne'ebé nia iha. Violénsia ne'ebé iha ema nia fuan, no fuan ne'ebé kanek tanba sala, mosu momoos iha sinál moras oioin nian iha rai, bee, anin no kriatura sira tomak. Tan ne'e, iha ema kiak-sira nia leet, ne'ebé ema hewai no haterus, ita bele sura mós ita-nia rai, ne'ebé ema hanehan no sobu rahun". Jezús nia agonía iha Getzemani mak hanesan agonía ne'ebé ita-nia inan Rai enfrenta tan ita-nia indiferénsia. Eskolante sira toba, bainhira Jezús terus, no la hatene hadeer hamutuk ho Nia no suporta nia iha tempu terus boot nian. Nune'e mós ita la hatene suporta no tau matan ba ita-nia "uma komun". Ohin mós ita dukur no ita la kahi haree buat ne'ebé ita bele halo atu proteje ita-nia Rai, hahú husi moris loron-loron nian.

H: Hafanu ami-nia laran ne'ebé dukur no indiferente

1: Na'i, tulun ami atu la sai indiferente ba problema ambientál oinoin ne'ebé halo ami-nia Rai hetan terus

H: Hafanu...

1: Na'i, hafanu ami-nia laran atu ami bele tulun ami-nia "uma komun" no fó fali ba ema ninia dignidade no ninia sentidu moris nian.

H: Hafanu...

G: Aman, ami hatene katak iha Ita la lakon buat ida no ami-nia sala mós serve ba objetivu ida. Halo ami experimenta katak Ita la husik Ita-nia kriatura sira no Ita prontu atu mai tulun ami. Ami harohan...

H: Amen

II: JEZÚS SIMU NO LORI KRUS

Gastu no hafoer bee nian mak krus todan liu ne'ebé ita impoin ba kiak sira ho ita-nia hahalok egoista.

Lk 9,23-24

L2: La fó asesu ba bee ba kiak sira katak ema nega direitu ba moris ne'ebé iha hun iha dignidade.bee ne'ebé falta ka foer, rai ne'ebé sai hanesan rai fuik maran, inundasaun ne'ebé estraga buat hotu ne'ebé harii ho kosar been sai krus ida ne'ebé dala barak ema sira tau iha maluk sira nia kbaas; krus ida ne'ebé la'ós ninian maibé nia lori tan moris nia prekaridade. Agrikultór sira nia mundu hetan situasaun difisil. Ema barak, liuliu iha rai kiak liu, hetan moras sira tan bee la moos ne'ebé influénsia kualidade moris nian.

H: Na'i, halo ami rekoñese Ita liman kriadora iha ami-nia biin bee

1: Ita ne'ebé lori krus ba ami-nia salvasaun, tulun ami, ho Ita-nia grasa, atu troka hahalok ema sira nian ne'ebé impede asesu ba bee ba ema kiak sira, direitu moris no dignidade nian.

H: Na'i, halo ami rekoñese ...

1: Perdua ami, Na'i, tanba dala barak ami halai husi empeñu atu harii futuru di'ak liu ba umanidade tomak, liuhusi justisa interjerasional, nu'udar hun ba ema hotu nia bem estar.

H: Na'i, halo ami rekoñese ...

G: Na'i, haboot iha ami respeitu kle'an ba natureza no hakaran atu tau matan no defende nia no tulun ami atu sai koresponsavel no solidariu ho ami-nia maluk sira ne'ebé la hetan direitu ba bee. Ami harohan ne'e...

III: JEZÚS MONU BA DALA ULUK

Jezús ne'ebé monu iha dalan Kalvariu nian halo ami hanoin ba kanek sira ne'ebé ita provoka ba teritoriu bainhira ita la hatene tau matan

Is 53,4-5.8

L2: Se ita hateke ba ita-nia rai ita duvida kona-ba sabedoria ema nian: iha tasi ibun bele haree lixu oinoin, mota sira, ne'ebé bainbain maran sai fali mota boot ne'ebé taka buat hotu, harii uma iha fatin naran de'it, valeta sira intopida... hafaoin inundasaun. Natureza sai rebelde no foti fali buat ne'ebé ninian, no ita buka keda se mak sala... dook husi ita. Ita susar atu asumi ita-nia responsabilidade, ita seidauk hatene prevene dezastra hodi respeita ambiente. La serve ko'alia kona-ba ita-nia rai nia fafurak se ita la aprende atu tau matan ba nia no entrega fali ba ita-nia oan sira hanesan Maromak entrega mai ita.

H: Na'i, tulun ami

1: Dala barak ami buka ami-nia interese hodi estraga ambiente nia fafurak. Suporta ami atu husik ho hahalok la responsavel.

H: Na'i, tulun ami

1: Atu ami manán tentasaun atu halo an hanesan kriador sira, maibé hahú atu kolabora ho Ita-nia obra kriaun nian

H: Na'i tulun ami

G: Na'i, tan Ita-nia Oan nia monu, tulun ami atu deskobre hikis fali ami-nia kondisaun kriatura nian, atu bele sai mahein, la'ós na'i, kriaun nian. Ami harohan ne'e...

IV: JEZÚS HASORU NINIA INAN

Hamutuk ho Maria nia terus ita hanoin ba terus ne'ebé mai husi violénsia hasoru feto sira, iha forma oinoin.

Lk 2,34-35

L2: Amo Papa Francisco nia liafuan dahuluk sira iha tinan 2020 ba feto sira: “Violénsia hotu ne’ebé fó ba feto sira mak ofende Maromak, ne’ebé moris husi feto ida... tuir buat ne’ebé Biblia haktuir, feto mak tutun kriaun nian, hanesan rezumu kriaun tomak nian. Iha nia ita hetan objetivu kriaun nian: fó no rai moris, komuñaun ho buat hotu, tau matan ba buat hotu”. Maibé violénsia hasoru feto sira mak violasaun boot tebes hasoru direitu umanu sira no inklui abuzu fisiku, seksuál, psikolojiku no ekonomiku. Ita prezisa fó visibilidade ba vitima sira abuzu nian, ita tenke halo hanesan Jezús ne’ebé la hatudu diskriminasaun hasoru feto sira, maibé defende sira husi mane sira nia dominiu.

H: Ami harohan ba feto sira mundu tomak nian

1: Na’i, feto barak loron-loron hetan violénsia, abuzu, ofensa, umiliaun fisiku no morál. Tulun ami atu hapara violénsia sira ne’e ho domin nia kbiit.

H: Ami harohan...

1: Na’in Feto, husi momentu Kalvariu nian, la iha inan ida nia tanis ne’ebé estranu ba ita. Tulun ami atu hetan lei no politika foun sira ba dignidade no respeitu feto sira nian iha rai hotu mundu nian.

H: Ami harohan ...

G: Na’i, halo ami-nia parokia no comunidade sira sai fatin iha ne’ebé hala’o estilu foun relasaun entre mane no feto sira, atu ami bele sai assembleia oan Maromak nian. Ami harohan ne’e...

V: SIRENEU TULUN JEZÚS

Soldadu sira obriga Sireneu atu lori Jezús nia krus. Ita bele hili atu lori krus tan domin, la’ós pesoalmente de’it, maibé mós hotu hamutuk nu’udar Maromak nia povu.

Mt 27,32;16,24

L2: Soldadu sira kaer Sireneu no tau krus iha ninia kbaas, Simaun simu de’it... ita la hatene se husi enkontru ida ne’e mosu fiar ba Jezús. Jezús ne’ebé mesak bele soi mundu, husu mai ita atu fahe Ninia krus ho domin, atu tulun Nia lori krus sira iha mundu tomak, no entre krus sira ne’e Papa Francisco temi “ita-nia uma komun ne’ebé vitima husi ita-nia egoizmu no poder”. La to’o farda ida atu dehan katak ita hanesan Sireneu, ita presiza sente problema sira ne’e hanesan “ita nian”.

H: Na’i, hamanas ami-nia fuan atu ami bele hanoin no halo tuir Ita-nia domin

1: Tulun ami atu tau matan ba maluk sira no uma komun bainhira terus, maski bolun ida ne’e bele troka ami-nia projetu sira.

H: Na’i, hamanas....

1: Halo ami partisipa ba ema no mundu nia terus atu bele sai servidór salvasaun nian no hetan Ita-nia ksolok.

H: Na’i, hamanas....

G: Na’i, tulun ami atu enfrenta ami-nia maluk sira nia terus nu’udar Ita-nia povu ne’ebé moris iha justisa no karidade. Ami harohan ne’e...

VI: VERONIKA HAMOOS JEZÚS NIA FUTAR OIN

Ho jestu aten-barani nian, Veronika rekoñese sinál glória nian iha Jezús nia oin ne’ebé kanek. Ita mós presiza hanoin fali ba kriaun nia oin terus nian na ba ita-nia maluk barak ne’ebé ema haluha ka la haree.

Is 53,2-3

L2: Ita hanoin ba karidade no ternura ne'ebé Veronika hatudu hodi hamoos Jezús nia Futar Oin. Jezús nakonu ho kanek, ran, kosar ben, no la'o daudaun sae ba kalvariu. Veronika tuir Nia no partisipa ba Ninia terus; teki-tekir, ho jestu kompaixaun nian, nia hatudu ninia laran luak no domin. Ohin loron, kriaun mós hatudu kanek ne'ebé estraga Jezús nia Futar Oin: hahalok hasoru moris (husi abortu to'o euthanasia), violénsia, funu sira ho ninia vitima inosente, dezastre ambiental no sira ne'ebé iha kbiit ne'ebé hanehan kiak sira. Ema la iha aihan, bee, formasaun, uma no sira lakon esperansa ba futuro. Iha kanek sira ne'e nia oin, Veronika hanorin mai ita atu hatudu jestu domin nian ba maluk sira.

H: Tan Veronika nia jestu, halo ami-nia fuan sai hanesan Ita nian

1: Na'i, suporta ami ho Ita-nia grasa, liuliu bainhira situasaun sai imposivel no ami besik atu lakon esperansa ba futuro

H: Tan Veronika....

1: Na'i, hafoun ami-nia laran no halo ami sai fiel ba ami-nia servisu, nune'e ami bele kolabora ho Ita atu nakfilak mundu ho domin

H: Tan Veronika....

G: Aman Maromak, ami moris iha terus no tauk no ami haka'as an atu sees nia. Keta husik ami-nia fuan sai matan delek hodi haree de'it ho superfisialidade no liberta ami husi indiferénsia ne'ebé la permite ba ami atu sente kriaun nia terus no maluk sira nia susar. Ami harohan ne'e...

VII: JEZÚS MONU BA DALA RUA

Hanesan Jezús ne'ebé monu iha krus okos, nune'e difikuldade moris loronloron nian bele hanehan ema sira se la husik Espíritu Santu gia nia.

1Pt 2,23-24

L2: Jezús monu dala ida tan. Nia lori todan husi persegisaun Kreda nian no husi ema ne'ebé ko'alia aat no bosok hasoru Kreda nian. Na'i Jezús, iha injustisa mundu ne'e nian ami la hatene tahan ho pasiénsia. Dala barak ami harohan atu Ita hasai ami husi todan krus nian, krus ne'ebé dala barak ami mak inventa hodi la tau matan ba ema seluk no natureza. Loron hirak ne'e hanorin mai ita katak la bele "konsidera natureza nu'udar buat ida ne'ebé ketak hosi ita ka nu'udar moldura de'it ida hosi ita-nia moris" (LS 139)

H: Na'i, suporta ami iha momentu susar ida ne'e no hamoris esperansa iha ami.

1: Espíritu lialoos nian, hanorin ami atu la'o banati tuir Kristu atu hala'o ninia ukunfuan pasiénsia nian ho atitude fuan nian.

H: Na'i, suporta....

1: Haroman ho Ita-nia grasa ukun-na'in sira nia neon no gia sira atu buka nasaun hotu nia di'ak

H: Na'i, suporta....

G: Aman Maromak, tan domin mai ami, Ita-nia Oan lori todan krus nian. Tulun ami atu komprende katak nia terus no tahan buat hotu ho liberdade, ho pasiénsia, atu hanorin ami oinsá bele moris. Ami harohan ne'e...

VIII: JEZÚS HASORU FETO SIRA JERUSALEM NIAN

Iha ita-nia mundu, iha inan barak ne'ebé tanis, reza, luta ba sira-nia oan sira, ba sira-nia saúde, ba sira-nia futuro ne'ebé dezempregu, pobreza no funu ameasa.

Lk 23,28-31

L2: Iha Brasil Nord-Est ema enfrenta dezastre ambientál ida: bee matan ida iha prezensa Pfas nian, venenu kimiku ida ne'ebé kona liuliu labarik sira. Atu proteje labarik sira nia saúde, grupu ida inan sira nian ("Inan kontra Pfas") ho aten-barani hahú sensibiliza parlamentár sira, administrator provinsial no lokal sira, sociedade sivil. Sira-nia luta manán ema barak nia atensaun no hahú hala'o projetu sira atu fornese bee moos. "Buat hotu iha relasaun ba malu no kuidaду loloos ita-nia moris rasik nian no ita-nia relasaun ho natureza la bele haketak hosi fraternidade, justisa no fidelidade ba ema seluk." (LS 70)

H: Tulun ami atu la hela pasivu.

1: Bainhira ema terus tan mate ka moras ba politika ambientál "foer".

H: Tulun ami....

1: Bainhira hasoru inan sira ne'ebé ho aten barani luta ba sira-nia oan nia futuru di'ak

H: Tulun ami....

G: Na'i, Ita konvida ami atu tanis tan ami-nia frakeza sira atu bele rekoñese Ita nu'udar Aman laran luak nian ne'ebé hakiak ami ba ksolok. Tulun ami atu iha matan nakloke no atentu atu harii mundu foun ida, iha ne'ebé dezvoltamentu ekonomiku promove ema hotu nia bem estar. Ami harohan ne'e...

IX: JEZÚS MONU BA DALA TOLU

Monu dala ida tan. Tan ema nia liman, kriaun mós monu no ita la hatene se bele fila hanesan uluk. Tau matan ba natureza la bele hein tan!

Is 53,7.12

L2: Espertu sira dehan ona: ita presiza para atu ataka ita-nia "uma komun"... tarde ona! Oras ne'e ita-nia Rai, inan ne'ebé hadomi, hatudu dezastre naturais oinoin, maibé ema mak kria dezastre sira ne'e. Dala barak ema uitoan nia interese, kria dezastre ba ekilibriu natural no ba ema barak. Maibé ema seidauk aprende husik natureza, no mós la rekoñese katak "ita la bele haketak ita-nia preokupasaun ho natureza, ho justisa ba ema kiak, ho haka'as-an iha sociedade no ho dame iha fuan laran." (LS 10)

H: Hodi kontempla kriaun, halo ami tama iha mistériu domin Maromak nian

1: Tulun ami atu liberta an husi hakaran poder no osan nian, ne'ebé provoka ofensa ba natureza no maluk sira

H: Hodi kontempla kriaun...

1: Na'i, loke ami-nia matan atu haree no komprende fafurak Rai nian, ne'ebé Ita fó mai ami nu'udar dom, atu ami bele hadomi no respeita

H: Hodi kontempla kriaun....

G: Aman kriatura hotu nian, halo kriaun hamriik fali husi dezastre ne'ebé ami rasik provoka: haraik mai ami matan foun atu haree rai nia fafurak, fatin Ita-nia prezensa nian no espasu iha ne'ebé Espiritu sei servisu daudaun . Ami harohan ne'e...

X: EMA KOLU JEZÚS NIA HATAIS

Jezús nia situaun halo ita hanoin ba ita-nia rekursu naturais: ema barak foti no na'uk no sira ne'ebé hetan konsekuénsia mak kiak sira!

Jo 19,23-24

L2: Soldadu romanu sira iha laran rua-rua kona-ba Jezús nia unuk no sira la lees. Maibé ita, la moe atu lees ita-nia "uma komun": ai-laran, foho, tasi, biodiversidade animál, rikusoin iha rai okos ne'ebé provoka funu, korupsiun, esploraun ba labarik sira atu servisu. Dala barak ema husik area rural sira,

no tanba ema la tau matan ona, hahú rai halai, inundasaun. Papa Francisco fó hanoin mai ita eziénsia atu “kuda identidade komún, istória ida ne’ebé ita rai no hatutan ba ema seluk. Nune’e, ita tau matan ba mundu no kualidade moris ema kiak nian, ho sentidu solidariedade ne’ebé, iha tempu hanesan, konxiénsia atu moris iha uma ne’ebé ita hotu nian, ne’ebé Maromak saran mai ita. (LS 232)

H: Aman, liberta ami husi indiferénsia konsumistika

1: Hanesan hatais representa ema nia dignidade, nune’e “hatais” Rai nian hatudu divindade Kriasaun nian. Perdua ami tanba haluha buat ne’e

H: Aman, liberta...

1: Hodi kolu Rai nia hatais, ami sai atan ba lojika merkadu nian, ne’ebé la fó esperansa ba sira ne’ebé la iha kapasidade. Perdua ami ne’ebé la konxiente kona-ba buat ne’e

H: Aman, liberta....

G: Aman, tulun ami atu komprende katak ami la bele hadi’ak ami-nia relasaun ho natureza no ambiente se la hadi’ak relasaun umana fundamentál sira, hahú husi relasaun ho Ita, Maromak Kriadór. Halo ami rekoñese Ita iha maluk sira no natureza ne’ebé saran iha ami-nia liman. Ami harohan ne’e...

XI: EMA HEDI JEZÚS BA KRUS

Ema hedi Jezús ba krus no ita hedi Natureza no moris ba krus!

Is 53,12

L2: Papa Francisco hakerek: “Bainhira ser-umanu tau nia an-rasik iha sentru, la kleur sei fó prioridade absoluta ba ninia interesse kontinjente sira, no buat seluk sai hotu relativu de’it.” Nune’e “buat ne’ebé la serbí kedas ninia interesse rasik, entaun lakon nia folin. Iha ida-ne’e, iha lójika ne’ebé permite komprende oinsá habosu malu ho atitude oioin ne’ebé provoca iha tempu hanesan degradasaun ambientál no degradasaun sosiál” (LS 122). Jezús iha krus dehan mai ita katak ita bele hateke ba Nia hodi aprende atu respeita limitasaun, atu haree sasán materiál nia superfisialidade, atu rekoñese ema ne’ebé simu esplorasau ka abuzu nia terus.

H: Perdua ami, Na’i, tan sala sosiál ne’ebé ami la hatene rekoñese

1: Ita ne’ebé husik ema hedi Ita ba krus, tulun ami atu la halai

H: Perdua ami, Na’i...

1: Hodi kolu Rai nia hatais, ami sai atan ba lojika merkadu nian, ne’ebé la fó esperansa ba sira ne’ebé la iha kapasidade. Perdua ami ne’ebé la konxiente kona-ba buat ne’e

H: Perdua ami, Na’i....

G: Aman, tulun ami atu komprende katak ami la bele hadi’ak ami-nia relasaun ho natureza no ambiente se la hadi’ak relasaun umana fundamentál sira, hahú husi relasaun ho Ita, Maromak Kriadór. Halo ami rekoñese Ita iha maluk sira no natureza ne’ebé saran iha ami-nia liman. Ami harohan ne’e...

XII: JEZÚS MATE

Hanesan Jezús iha krus, nune’e ita-nia rai mós atu mate iha krus sira ne’ebé ema nia liman prepara daudaun. Ita haluha katak ita mós kriatura, nune’e ita sei tuir Kriasaun nia destinú.

Lk 23,44-48

L2: Durante sekulu rua ikus ne’e ema sira “ataka” ita-nia uma komun no nia sei mate daudaun tanba ita la tau matan, tanba ema nia intervensaun mak esplorasau de’it. Liuliu ita haluha katak “Santísima Trindade nia Ema ida hatama-an iha universu ne’ebé halo tiha, hodi fahe nia sorti rasik to’o krúz. Hosi

mundu nia hahú, maibé liuliu hosi Maromak halo An ba ema, mistériu Kristu nian hala’o nafatin, maski ita la bele haree hotu, iha realidade naturál nian tomak, hodi la afekta ho ida-ne’e ninia autonomia.” (LS 99). Tuir sarani sira nia visaun, kriaun tomak nia destinu liu husi Kristu nia mistériu. Konxiénsia ida ne’e, ne’ebé mai husi fiar paskál, bolu ita atu sai Aman Maromak nia instrumentu atu mundu ida ne’e bele sai fali hanesan Nia mak mehi.

H: Na’i, halo ami deskobre fali ami-nia kondisaun kriatura nian

1: Dala barak ami la komprende katak ambiente umanu no ambiente naturál sai aat hamutuk

H: Na’i, halo ami...

1: Halo ami konxiente katak ami la bele enfrenta problema ambientál se ami la fó atensaun ba motivu ne’ebé kria buat hotu ne’e.

H: Na’i, halo ami....

G: Aman, Ita hakarak soi kriaun liuhusi Ita-nia Oan nia krus, hametin iha ami, Ita-nia dixipulu sira, hakaran atu tau matan ba povu sira no mundu nia fragilidade. Ami harohan ne’e...

XIII: SOLDADU IDA SONA BORUS JEZÚS

Iha estasaun ida ne’e ita konsidera kbiit redentora husi ran no bee ne’ebé sai husi Jezús nia sorin. Maromak nia laran sadi’a de’it bele halo buat hotu, ekonomia mós, hola nia fatin loos.

Jo 19,33-34

L2: Covid-19 manán rai hotu, ema tuir ema, nia liu husi nasaun hotu. Ema barak sei haka’as an daudaun atu manán nia, maibé pandemia hatudu sistema sanitariu nia frakeza iha nasaun oinoi, iha ne’ebé lukru mak sai importante liu fali ema nia saúde. Iha mós aspetu pozitivu: ema matenek husi fatin oinoi servisu hamutuk atu manán funu baluk ida ne’e. Maibé ita-nia kompeténsia sientifika sei la vale buat ida se la iha Maromak. Ita prezisa haboot ita-nia klamar atu ita la bele monu ba desespero, ita prezisa harohan ba Jezús, ne’ebé prezente, maibé mós ita la bele haluha katak ita simu bolun atu fiel ba ita-nia responsabilidade sivil no sosiál.

H: Aman laran sadi’a, rona ami-nia hamulak

1: Ami harohan ba sira ne’ebé terus tanba Covid, atu sira la bele lakon esperansa, maibé hetan kbiit no konsolasaun iha fiar

H: Aman laran sadi’a...

1: Ami saran iha Ita-nia liman sira ne’ebé “front-line”, liuliu operadór sanitariu sira, atu Ita tau matan no hakbiit sira.

H: Aman laran sadi’a....

G: Aman, emerjénsia sanitaria ne’ebé ami experimeta iha tinan rua ne’e konvida ami atu sai husi ami-nia an rasik no manán individualizmu ne’ebé taka ami. Haraik kbiit mai ami atu hatán ba konvite ida ne’e hodi sai kolaboradór ativu sira ho Ita-nia laran sadi’a. Ami harohan ne’e...

XIV: EMA HAKOI JEZÚS

Parese katak la iha ona esperansa atu rekupera faturak kriaun nian, hanesan eskolante sira sente bainhira hakoi Jezús. Maibé ita hatene katak, liu tiha Sabadu Santu nia terus, ta’uk, silénsiu no nakukun, sei mosu Moris Hi’as

Jo 19,40-42

L2: Hakoi tiha Jezús, eskolante sira la iha ona esperansa, hanoin ba matebian ida ne'e no sira la hatene hateke liu rate. Amo Papa dehan: "Maibé ita seidauk lakon funu ida-ne'e, tanba ser-umanu sira, ne'ebé bele halo aat barak, mós bele supera-an, hili filafali atu halo di'ak no hafoun-an, hodi la fó fatin ba kondisiunalizmu psikolójiku no sosiál ne'ebé hanehan sira. Sira bele haree an-rasik ho onestidade, ... no hahú la'o iha dalan foun to'o liberdade loloos, ... nakloke ba di'ak, ba lialoos no ba beleza, ka kapasidade atu book-an ne'ebé Maromak hamoris nafatin iha ita-nia fuan laran." (LS 205). Ita mós bele hakotu ona atu loke an ba di'ak, hodi hetan fali dignidade ema nian atu umanidade no kriaun tomak bele moris fali.

H: Na'i, haraik aten-barani mai ami atu hili di'ak no lialoos

1: Halakan fali iha ami esperansa kona-ba moris foun ida

H: Na'i, haraik...

1: Tulun ami atu loke an ba Espíritu Santu nia asaun, nune'e sei hamoris fali iha ami-nia hakaran justisa nian.

H: Na'i, haraik....

G: Aman, hamate iha ami "ema tuan", ne'ebé kesi an ba egoizmu, ba aat no ba sala. Tulun ami atu komprende katak tempu ida ne'e husu mai ami atu hein ho fiar no esperansa, iha silénsiu, promesa salvasaun nian ba ami no kriaun tomak . Ami harohan ne'e...

XV: RATE MAMUK

Iha kbiit husi Jezús Moris Hi'as ita hetan solusaun ba aat ne'ebé ita hahú hodi lakon respeitu ba ita-nia an no ba kriaun tomak.

Mc 16,2-6

L2: Buat hotu ko'alia kona-ba moris, Jezús hanorin buat ne'e! Resureisaun iha kbiit "sai hosi situsaun sobu rahun ita-nia an-rasik iha ne'ebé ita mout daudaun" (LS 163). Fiar nia rikusoin no tradisaun espíritual, onestidade iha peskiza sientifika, ekonomia nia umanizasaun no globalizasaun solidariedade nian mak aspetu husi ekolojia integral, tanba "Aman ida de'it mak halo ita hotu, hamutuk tanba tali-fukun ne'ebé la haree no harii hanesan família universál ida, no komuñaun aas ida ne'ebé no dada ita atu iha respeitu sagradu, nakonu ho domin no haraik-an" (LS 89).

H: Na'i, tulun ami atu moris hi'as

1: Bainhira haka'as an ba bem komun halo ami hasoru enkomprensaun

H: Na'i, tulun ami...

1: Bainhira ami hanoin katak la iha ona esperansa

H: Na'i, tulun ami....

G: Aman, tulun ami atu sai sasin Jezús nian: iha Kreda ida ne'e ami mós bele kolabora atu ema hotu bele rekoñese dalan ne'ebé lori ba moris rohan la'ek . Ami harohan ne'e...

Santa Madre...

G: Na'i, ami agradese Ita tanba ami bele hala'o dalan husi krus ba Resureisaun hamutuk ho Ita-nia Oan. Perdua ami se Ita-nia terus kontinua iha mundu tan ami-nia sala. Tulun ami atu sai sensível ba ema hotu no mundu tomak nia terus, hodi fiar katak domin sei soi mundu. Ami harohan ne'e...

Kantu final: